



L'anghel surri e derasa cuntentientscha – sco bleras outras sculpturas da l'entagliader da Breil. FOTOS C. CADRUVI



Sep Gabriel expona per la terza giada. Las emprimas exposiziuns èn stadas a Chemnitz e Rehanau.

# Manuchels, anghels e giats da Breil èn exponids a Turitg

In entagliader sursilvan ha success en la Bassa

DA CLAUDIA CADRUVI / ANR

■ **Ellas fan buna luna, las figuras che Sep Gabriel taglia ord il lain. Ed ellas sa vendan bain en la galaria Nordstrasse a Turitg.** Savens chattan ins sculpturas d'art che fan tema u d'entartar pensiv. Ma en la galaria Nordstrasse 152 inscuntran ins da preschent figuras plain bunaveglia. Igl è anghels, tartarugas, giats e manuchels cun in surrir en fatscha.

Schizunt l'urs cun ses dents gits ed il tschess cun sia cumparsa impressiuanta paran insaco d'esser cumpogns simpatics.

Sep Gabriel expona anc fin ils 12 da fanadur. La galaria è averta trais giadas l'emna. L'entagliader da Breil è per il solit preschent e raquinta gugent da sia lavur.

## Adina lavurà sin il «bau»

Gabriel è naschì ils 21 d'avust 1946 ed è creschì si a Dardin-Mulin ed a Breil. Suentar scola ha el lavurà l'emprim tar in pasterner a Walenstadt per emprender in pau tudestg. Lura è el stà lavurer da construcziun fin tar la pensiun il 2006. Ch'el ha cumenzà ad entagliar è casualità. «Durant scola na sun jau gnanca stà uschè bun da malegiar», raquinta Gabriel. Il 1985 ha el fatg ensemen cun collegas in curs d'entagliar si Mustér. Suentar intginas emprovas ha el dentant mess d'ina vart il cuntè.

Pir diesch onns pli tard – igl è stà durant ina concorrenza dad ir cun schlieusa ad Arosa – ha Gabriel vesì en il gaud vi d'in bist ina creschientscha che sumegliava in manuchel che tegna il venter cun ils mauns. Gabriel è i a chasa, ha prendì lain e guaffens ed empruvà da far sez in tal ma-

nuchel. Uschia ha cumenzà la passiuin. L'emprim ha el fatg in entira partida ume-nets cun venter, e lura plaunsieu gughegià dapli. Sia emprima figura gronda è medemamain exponida a Turitg. Ella regorda ad art african u indian cun sias sculpturas stendidas.

## Las ideas vegnan era la notg

Sch'el entaglia, ha el anc outra tocca da lain sper el ch'el contempla da temp en temp. Tutenina vesa el insatge en il lain, per exempel in rustg u in giat. Las ideas vegnian era la notg, lura stoppia el l'otra damaun immediat ir vidlonder, di Gabriel. Insumma lavuria el il pli gugent la damaun. Ins dovria peda e ruas per entagliar.

Ses guaffens preferids èn ils stgalpers, il marti da lain, il sigurin ed il cuntè da tagliar ora bigls. Il lain obtegn Gabriel

dals purs. Igl è tscharscher, nuscher, ischi, badugn, fraissen e mintgatant in toc d'in ulm – ozendi ina rarità. Igl è per gronda part lain dir. «Quel manglass ins tagliar uschèditg sco el ha anc schit, uschi-glio na pon ins far nagut pli.» Gabriel ha gugent tocca cun biergnas. En quella vesa el blier. «Lura zambregel jau in zitg e fatsch ina tartaruga u in crocodil.»

## Gia exponì en Germania

Gabriel raquinta cun simpels peds da l'entagliar. Auter tuni, sche *Ulrich Stückelberger* discurra. El è pictur e scolast d'art ed ha organisà l'exposiziun. Stückelberger ha scuvert pli u main per schaberg il sculputurist. Ina giada ch'el saja stà a Breil – atgnamain per visitar il vegl entagliader *Giachen F. Cavegn* – haja el vesì tar Sport Beat ina figura da Gabriel. «Jau sun stà sco electrisà.» El haja fatg ina visita al sculputu-

rist ed haja immediat vesì ch'i sa tractia tar sias lavurs d'insatge spezial ch'ins na possa betg imitar.

«Per fortuna n'ha Sep Gabriel mai visità ina scola d'art e mai studegià anatomia», di Stückelberger. Gist perquai sajan sias figuras uschè creativas, originarias, sinceras ed amicablas. Da quest avis èn para anc auters, pertge las sculpturas ch'èn exponidas a Turitg sa vendian bain, di l'organisatur.

Igl è gia la terza exposiziun da l'entagliader da Breil. Las emprimas duas han gi lieu a Chemnitz en Germania ed en il hotel Adler a Rehanau.

**L'exposiziun è averta fin ils 12 da fanadur, mingamai la gievgia ed il venderdi da las 18.00 fin las 21.00 e la sonda da las 14.00 fin las 17.00. La galaria sa chatta en la Nordstrasse 152 a Turitg. Ils 5 da fanadur cumenza a Breil in'exposiziun cun set artists sin la piazza da golf. Là vegnan exponidas tschintg sculpturas da Sep Gabriel.**